

թեան: Ինչ ազգ չէր հետեւում իսլամին, նա համարում էր պիղծ, գրկած թէ այս աշխարհի եւ թէ հանդերձեալ կեանքի երանութիւններից, որոնց պատրաստել էր ալլահը միմիայն Մուհամմեդի շիաների համար: Այս պատճառով, մահմեդականը, ոչ միայն ատելութեամբ էր նայում դէպի այլակրօնները, այլ իրան մեղք էր համարում սերտ յարաբերութիւններ ունենալ նրանց հետ: Մահմեդականը չէր ուտում կերակուրը, որ պատրաստած էր այլակրօնի ձեռքով, նա չէր հագնում հագուստը, որ գործած էր այլակրօնի ձեռքով. նա իր տան մէջ չէր բանեցնում կարասիք, որոնց արհեստագործել էր այլակրօն մարդը. մի խօսքով, նա պիղծ էր համարում բոլոր արդիւնաբերութիւնը, որ դուրս էր գալիս մահմեդականութեան չպատկանող ազգերի ձեռքից: Նա պիղծ էր համարում եւ այլակրօնների անձը. օրինակ, մի հայ, մի հրեայ, մի ասորի անձրեւային օրերում, թաց հագուստով չէին կարող քսուել մահմեդականին. այս համարում էր սրբապղծութիւն եւ անզգոյշ յանցաւորը կրում էր իր պատիժը: Ահա այսպիսի եւ դրանց նման շատ խտրութիւններ, որոնց դրել էր մահմեդականութիւնը մուսուլմանների մէջ, – ոչ միայն քրիստոնեաներին եւ հրեաներին ենթարկում էին իսլամի հալածանքին, այլեւ գրկում էին նրանց շահուել իրանց արդիւնաբերութիւնից, եւ վնասում են իրանց տնտեսութեանը: Դա էր գլխաւոր պատճառը հայերի, հրեաների եւ ասորիների աղքատութեան:

Մօլլաները, բացի ռանց ժողովրդին հոգեւոր ուղղութիւն տալուց, կատարում էին եւ չարիաթի գործադրութիւնը, այսինքն, նրանց ձեռքումն էր օրէնքը եւ արդարութիւնը, որ ականդել էր ալլահը Մուհամմեդի միջնորդութեամբ: Ամէն գործ, թէ քրեական, թէ քաղաքական, վճռում էր նրանց ձեռքով: Այստեղ եւս այլադաւանները գրկում էին շատ իրաւունքներից, որ վայելում էին մահմեդականները: Օրինակ, մի քրիստոնեայ ունէ դատաստանական գործ մահմեդականի հետ. գործը քննում է մօլլան. քրիստոնեան իր իրաւունքը հաստատելու համար չէր կարող ներկայացնել վկաներ իր հաւատակցիներից, որովհետեւ քրիստոնեայի վկայութիւնն ընդունելի էր դատարանում այն ժամանակ միայն, երբ նա տոած կը լինէր յօգուտ մահմեդականի, իսկ ընդդէմ մահմեդականի վկայելու նա իրաւունք չուներ: Այսպիսի դէպքերում պահանջում էր քրիստոնեայից մահմեդական վկաներ. բայց ոչ մի մահմեդական չէր ցանկանայ քրիստոնեայի օգտի մասին վկայել, որովհետեւ այդ կը համարէր իր համար մեղք: Ուրեմն թէ առաջին եւ թէ վերջին դէպքերում քրիստոնեան գրկում էր վկաներ ներկայացնելուց, եւ, ի հարկէ, տարւում էր գործը, մի այնպիսի դատարանում, ուր գործերը վճռում էին ըստ մեծի մասին հիմնուելով վկաների ցուցմունքների վրայ: